

Zems Zapat meluwan kapi Zemsiyan kuye

Zapat meluwan kapi an kwiyan penan kuye ke sosok penan nen ku kukuñangapmti an keyan kup nep ku zenzeyelen. An Kawawangalen zetgat yanjan mnâmti makup ekñenan an kwi keyet kegogak zet mmot mtot omba penan mimiñan. Notnanan zewienen Zisasiyet meniñan nen kwitnan Zems ek dapmelange alaknan Zelusalem mka teman mambien ekñengat an damunin mange egan kuye manzeip. Zemsiyan an nâmkijpepenmak Zuda mangeengatan kumkalanți msat sambe mebet kokotnan ekñengat kumindaye.

An kwi ma kwiyan kuye keyan zet apapalak kegok kuye. Zet esentan penan kuye. Zet notnan zapat meluwan kapiyet kenan tazinen Matiyu kuye keyet katan kukuñan. Sekem kebongat Kawawangalen Zet Zapat Dolaknan Penananen mâtâti ekbak. Zems 2:13 makumti naman Matiyu 5:7 kegogak mainți ekbak. Zet sekam kebon ombanik Zemsiyelen zapat meluwanen aikbek.

Zapat meluwan kapi yanjan kapigok. Am nâmkijpepenmak Zuda mangeengatan weyanbe weyanbe mti tatnepeme sisipenpen sokbeme eknen katiknan bemtatatgalen nâmti zapat meluwan kapi kuye. Zemâtâtât notnan tazin keyan am kenin ma sekñin melen belen beme nâmkijpepemak tati keyet penan

msokbembeyelen. Kwit Kilais ke zapat meluwan kapiyet tuk etaŋ kukuŋaŋ.

Zet ŋotekŋaŋ temaŋ kapigogaŋ Zems zapat meluwan keŋaŋ talip:

1:1 Zet ŋeŋaŋ bemzenzeyelen zet

1:2-8 Nâmkiŋpepemak mama

1:9-11 Mânep milawatmak mama ma bekopsat mama

1:12-18 Tetimaemaeyaŋ yaŋin mimekbe

1:19-27 Kawawaŋgalen zet wagaŋ etaŋ nânâ ke ŋep yek

2:1-13 Kalalaŋgat yaŋaŋ zenzeŋaŋ

2:14-26 Nâmkiŋpepe yaŋaŋ mim eek

3 Nambalamin ekdamuŋ mimiyeleŋ zet

4:1-5:6 Am msat kapiyeleŋ mama mimi bekaŋaŋ

5:7-20 Zemâtâtât ikŋak ikŋak

¹ Neŋ Kawawaŋ ma Amobotnaŋ Zisas Kilaisiyeleŋ mulup an. Neŋ zapat meluwan kapi ingat indamukumindesâti kuyap. In Islaeliyeleŋ am maŋge 12 ekŋengat iŋsokŋine Zisas Kilaismak tususuŋin tazinaŋ kalaŋti lala bubuk bemti msat kataŋ mekobienŋ talip.

Nukŋaŋen kaliŋaŋ bem tatalaŋ nâmkiŋpepe penŋaŋgat yaŋaŋ mamsokbein

² Kilaismagen notnne, inmagen nukŋaŋ igak igak sokbeme keyet nâme keŋ sokukuŋaŋmak ku bewe; keŋin oloŋen palen tabep. ³ Kwitnaŋ kwitnaŋ keboŋaŋ nâmkiŋpepeŋin mmek mmek mi-mindikme katikŋaŋ tabep. Keyet penaŋaŋ inmagen katikŋaŋ bemti tatat omba sokbemindawe.

⁴ In nâmtekalim tati kan kataŋ nukŋaŋ pumti

gingiņ mtabep. Keyet penaņaņ nâmkiņpepeen kalīņaņ bemti an imbi penaņ mamaipgapmti nukņaņ pusât ku olabep.

⁵ Ingat tunģuwinangatnan am ņenaņ Kawawaņgalen set ma mama mimi ekņenaņ mimiyet nâmtikņaņ mam keyet olati ekņenaņ Kawawaņ dundum same egaņ ņep ņoktik dolakņaņ am sambe penaņ ndamti egaņ keyet zem watot watot ku mam. ⁶ Dundusâgât keņ zut palen yek; Amobotnaņ nâmkiņpemti penaņ dunduwep. Keņ zut mbep beme ekņenaņ nembu mamaņ tâgâyaņ kumbume mamekwazin keboņ bewep. ⁷ Am keboņgat dundundunĭn Amobotnaņaņ ku manâmindein. ⁸ Am keyelen ņoktikĭnĭn kilenĭ maepeemti mekozin ma ekņenaņ mama mimi mamip keyaņ set kwewetaņ mâti ku mamezin.

Mânep milawatmak mama keyaņ penaņaņ penaņ ku bein

⁹ An ņen bekopsat nâmkiņpepeņenmak ek Kawawaņaņ ekme iķņaņgat nembraņaņ mambein keyet nâmti oloņen mbe. ¹⁰ Yanģut an ņen nâmkiņpepeņaņmak mânep milawat sambe tasain keyepmti sek mobot ku mbe. Kawawaņaņ ekme yomtoņ beme gilik zem wage keyet nâmti oloņen mbe. Tep elewilinaņaņ dâlân zemti matolip sepem kegok mânep milawatnaņaņ yek bewe keyet sek mmobopiņ. ¹¹ Kasuwaņ tambuņaņ penaņ kwati tep elewilinaņ ekme aņģasimti dâlân zem msalen topme elimiakņaņ ke mayek bein. Sepem kegogak am mânep milawalin temaņ ekņenaņ gakime mka mundumin etaņaņ tabe.

¹² An ñen ek nukñanen katikñan bemti tapme Kawawañan eget nâme dolakñan mambein. Ek nukñanen windenñan mambein beme Amobotnañan mama kanzizit keyan miakpewe. Ke am Kawawañgat gogot mampeip ekñen indandayet zetik mge.

¹³ An ñen bekanangat tetimaemae sokbemsame kapigok ku zewe. “Kawawañan tatetinem nikzin.” An ñenan Kawawañ ku tetipepeyelen ma egan kegogak an ñen bekanan mimiyet ku matetipein. ¹⁴ Tetimaemaeyet yañan kapigosetgatnañ masokbein, ñen an ñenan ikñangalen mama mimi mgasik mimiyelen tikñanñan keñanen tazin keyan zemandamti tetipeme bekanan mme teman mambein. ¹⁵ Âpme bekanan mimiyet keñ punpun mamin keyan penañan yom maaiksain. Yom keyan tapmetneti teman bemti penañan gakiki maaikzin.

¹⁶ Notnne penan, in zet keyet ku nâmyunjuwep. ¹⁷ Kawawañan kegok ku mimiyelen egan taolet dolakñan ke mandain. Keyet Kawawañ Bipm An kwitnañ kwitnañ busatnañmak sambe mme sokbeye. Mme busatnañ ekñen keyan kan notnañgat busatnañin teman manzin ma kan notnañgat aiaikñan manzim. Ma nin Kawawañ tañam keboñmak ku bem mek ekbanek. Ek sepem kwep matazin. ¹⁸ Kawawañan nâmâtâtpeye ke zetnañ penañmagesetgatnañ am nâmkinpepen nemunambañane nin ndaige. Ke nin kwitnañ kwitnañ sambe Kawawañan mge keyet ñenñaninok benup.

Kawawaŋgalen zet wagaŋ etaŋ nânâ ke ŋepyek

¹⁹ Notnne penaŋ, in kapigok penaŋ nâseip, am in Kawawaŋgalen zet wagaŋ nânâyet elen beŋ bemi nâmbep. Zet zemti ŋenzinziŋ mimiyetgut kwelen kwelen mbep. ²⁰ Enenogat ŋenzinziŋ palen kwitnaŋ kwitnaŋ mamip keyaŋ Kawawaŋgalen mama mimi teŋ keyelen set mamimyunŋuin. ²¹ Keyepmti in mama mimi mŋasik sambe notnaŋ ma bekaŋaŋ msat palen palakŋaŋ bemtazin peme tapme keŋ sewak palen mamti Kawawaŋgalen zelaŋ keŋinan tewaŋ kindiŋaŋ time matowezin sepem kekok keŋinan time topme mamambep. Keyaŋ keŋin aŋgalaŋindendeyelen windenaŋ tasain. ²² In Kawawaŋgaŋ zet keŋinan bempaye keyet penaŋaŋ aikbep. Belak wagaŋ etaŋ nâmpemti ku nânâŋaŋ sepem mambep beme keŋin tetipewep. Kogogat zeme nâmti keyet kataŋ mbep. ²³ Ŋenaŋ Zet Zapat Dolakŋaŋ Penaŋ nâmtiŋgut ku nânâŋaŋ sekem mambe beme an keyaŋ amnaŋ zimoselin gapiamen ekti naman gilik zem belakŋaŋ ekti zimoselin makandat indoin sepem kekok bewe. ²⁴ Egaŋ ŋeŋzimosetnaŋ gapiamen ekpemti toti met kileŋ mamamti naman ŋeŋzimosetnaŋgat makandazin. ²⁵ Ma ŋen egaŋ Kawawaŋgalen zet penaŋ yomgalen mka katikŋangatnaŋ tetimti lala mapein zet ke yaŋaŋ weyaŋnââmâtâti mambe mti wagaŋ nânge ke ku makandatkuin. Nâmti gawepuwe an keboŋ ke Kawawaŋgaŋ nâmtikŋaŋ mpemti mukulem mme oloŋen palen mambe.

²⁶ An ŋenaŋ pigok mene otnâmbep, “Neŋ an nâmkiŋpepemak penaŋ mamayap,” zeyeyaŋgut

dembusekñan ku ekdamun mbe beme keñan tetipewe. An kebon nâmkinpepenñgalen mama mimiñan belakñan penañ bewe. ²⁷ Nâmkinpepen esemteñ ma kakanemun keyet penañan Bipm Kawawañgat zikatnan penañanmak bembeyelen kapigok mman ñep bein: Imbi kwambet ma namba dumen olat olat palen mame indikdamun mimindendeyelen. Ma msalengalen kwitnañ kwitnañ keyañ keñin mme bekañan bembeyelen keyet eksemti mamambep.

2

Am mânep milawalin temañ ma am bekopsat sepem kwep indatiwep

¹ Notnne, in Amobotnañ Zisas Kislais manâmkinpepgapmti am ekñengat tunguwinangatnañ notnañgat ken ke ken ke ku mbep. ² Neñ kapigogapmti zeyap, ondedakñinan an ñen melakandu dolakñan peme topme elimiak sopmañ mti kobe. Âpme egat baman an ñen bekopsat sangum kâlâpmañ endeleletnañan kobe. ³ Âpme in an elimiakñan temañmagañ kopme ekti pigok zewep, “Geñ pien mundumen kototat.” Kegok zempemti an bekopsat egat pigok zewep, “Geñ kainde bap palen metotat.” ⁴ In zemdelañ zenze mulup mimiyet kwiyañ zemindeyeyepm kekok mti am ñen mmopemti ñen mtopenmi tapmip? Kegok miyo ke bekañan.

⁵ Notnne, zet pigok zema nâit. Kawawañan am sepem zibon indakumtetime kobien? Msalen am bekopsat mamaip ekñen ke nâmkinpepen polak polak talipgapm Kawawañgalen zemâtâtât

katnanen mama keyet keñan mebegat indaman-dame kobien. Ke am egat nâmtikñañ mam-peip ekñen kekok mimindandayet zetik mami-mindain. ⁶ Âpme in am bekopsat ekñen zikalin galemaset maindigip. Ekñen ke mtot indemti nukñañ sekñinanek mambemindeip. Mme am sekñin mamolip ilin keyañ nukñañ indamti in an damuñmagen zelen maindatimti melip. ⁷ Mti Zisas in ikñañgat zapat indatitiñañ egat kwitnañ pembenañ ke kwelatmakumpeip.

⁸ Gitañgat mañgembein sepem kekok am not-nañgat gembewe. Zii zet Kawawañgalen Zet Itnañanen manañ kekok penañ kumpepeñañ ke gawepume ñep penañ bewe. ⁹ Yañgut am ekñañgat ken ke ken ke mbanik beme geñ an zii zet kululutoñ bewanik ma kekok mnekgapmti yomm mnik kekok bein. ¹⁰ Am ñenañ zii zet sambe ke gawepumâpme delañ zemâpbe yañgut zii zet kwep penañ ñen kuluwe beme an zii zet kululutoñ. ¹¹ Kawawañañ pigok zeye, “Awembin it kalelañ ku mbalup,” zemti ñen ewe pigok zeye. “Geñ kasa ku kuwanik,” yañgut geñ imbindi katipepepiñ mamti kasa kuwanik beme geñ an zii zet kululutoñ.

¹² In kapigok nâmbep, Kawawañgalen zet penañ yomgalen mka katikñañgatnan indatetimti lala maindein zet keyañ zemdelañ zenze kanen kosâpm keyepm weyañ nâmâtâti zelin sambe zewep ma mama mimi sambe weyañti mbep. ¹³ Enenogat Kawawañañ am ñengat añañalañ gogot ku mamip egañ am ekñen ke kogogak añañalañ gogot ku mimindawe. Bamgat añañalañ

gogot palen mama keyan kasa kasa palen mama
selan ime tobe.

*Nâmkinpepe mulupmanpij ke nâmkinpepe pe-
nan yek*

¹⁴ Notnne, an nenan, “Nej nâmkinpepemak
mamayap,” zewe, yangut egan am nen ku
mukulem mpewe beme nâmkinpepe kebon keyan
zigok kan delan zenzenan gapmukulem mbe?

¹⁵ Inmagengatnan nenan sanjum kâlâpgat ma
tu meuyet olat olat palen mame ¹⁶ ekti nenan
pigok dunduwe, “Gej meti nep masenik mti
tâgâyet msenikgat bakeyan ambulut mane kip-
man beme tasenik ma tu meu omba penan
nimnaleksenik.” An nenan zelan etan kekok
zemti am notn notn ku mamimindeinan kekok
zeme zigoset nep mukulem mpewe? ¹⁷ Keyepmti
nâmkinpepeyan keñ taolet mimi mulup ku mbe ek
nâmkinpepenan penanan yek bembenan kekok
zewanup.

¹⁸ Yangut an nenan pigok mene zenak, “Gej
manâmkinpepmi mamanik mme nej mama mimi
dolaknan etan mamiyap.” Âpme nej pigok
zewi, “Gej nâmkinpependi ke zikat namane
ekma mama mimi dolaknan kemak pepap ku
mambein keyepmti nâmkinpependi penanepij.”
Ma nej nâmkinpepenan zikat gama eegalen
mama mimi dolaknanmak temakwep mma
ekbak. ¹⁹ Kawawan Ek kwewetan zet kapi penan
manâmkinpenik e nep mamnik yangut zet ke we
bekanan eknenan kekokak manâmkinpeip. Mti
keyet sebelan diñdiñ mamip.

²⁰ An kenđipin, geŋ pigok nâmbek, geŋ belak etaŋ nâmkınpemti mama mimi dolakŋaŋ ku mbanik beme nâmkınpependi ke belakŋaŋ penañ bewe. Zet keyet yaŋaŋ zemkawaŋ bembeyelen zet zapat kapigok msowap ke kapi: ²¹ Eweŋaŋ sokŋ Abalaam egaŋ nemuŋaŋ Aisak sâpe sâpe bumbu munduman mopeye. Kan keyet Kawawaŋaŋ nâmpeme an teŋ penañ beye ke mama mimiŋaŋgatyepmti kegek mge. ²² Keyepmti pigok eknup, Abalaam nâmkınpepenañ ke mama mimiŋaŋaŋ mukulem mpeme penañmak beye. ²³ Eweŋaŋ Kawawaŋaŋ Abalaamgat pigok zeye ke katikŋaŋ beye. Abalaam egaŋ Kawawaŋ nâmkınpeme egat nâmpeme an teŋ beye. Keyepmti egat kwitnaŋ Kawawaŋgat notnaŋ penañ kogok zenzeŋaŋ. ²⁴ Egit. Kawawaŋ egaŋ am ŋen nâmkınpepenañgat etaŋ nâmpeme an teŋ ku mambein. Egaŋ mama mimi dolakŋaŋ ma nâmkınpepe eget keyaŋ temakwep bemalu keyet nâmpeme an teŋ mambein.

²⁵ Keyet sepmeŋ ŋen imbi set kilen mama kwitnaŋ Leap egaŋ Zâsuayaŋ an zut zemideme msat wiliŋgim eksâgât mebun idikdamuŋ mimidemti zemideme set ŋeneset mebun keyepmti Kawawaŋaŋ Leap egat imbi teŋ kegek nâmpeye. ²⁶ Keyepmti nin pigok nânup, sekŋ kapi nâmamaŋpiŋ ek ilak gakimti titokŋaŋpiŋ mawein. Kegogak nâmkınpemti mulup dolakŋaŋ ku maminup beme nâmkınpepeyaŋ gakimti yek penañ mambem wein.

3

Nambalamm weyaŋ ekdamuŋ mpewanup

¹ Notnne, ingat tunguwinanŋatnaŋ an zikat indanda mulup mimiyet windenŋaŋ ku bewep. Nâip, zemdelan zenze kan temanen Amobotnaŋaŋ zikat indanda an nin kwitnaŋ kwitnaŋ mmotindawe. ² Nin sambeyan kwitnaŋ kwitnaŋ mene mene maman yuŋgumtemezin. An ŋenan zikat indanda mulupmaŋ yuŋgumti zet kwep ŋen ku manzein beme an ke an dolakŋaŋ penaŋ. Kegok min beme sekŋaŋ butnaŋ notnaŋ sambe ŋep indikdamuŋ mamin.

³ Âs ekŋen zetn gawepupuyet nâmti aen butnaŋ takanzi nemboŋ dembusekŋinan pemann maa-pum talip. Âpme bukeboŋ keyaŋ âs temaŋ mim guluk gilik mampeme keyet nânâŋ mamezin. ⁴ In nembuen waŋga mamain keyet kegogak otnâit. Waŋga ke temaŋ penaŋ tâgâ katikŋaŋ keyaŋ indakumbume mamelip. Yaŋgut waŋga mti mamain egaŋ waŋga temaŋ ke deset mebegalen nâin beme kwitnaŋ ŋen stia zeip ke isikŋaŋ bugan keyaŋ mme gilik zemti egaŋ manâin keyegak esemteŋ mamezin. ⁵ Âpme am ningat nambalam sepem keboŋagak isikŋaŋ bugan yaŋgut kwitnaŋ kwitnaŋ nukŋaŋbenŋ penaŋ mamin. Nâip, tep butnaŋ menzok mann zinak ek isikŋaŋ penaŋ yaŋgut bukeyaŋ bumann zimti tep msasat temaŋ manzim kawaŋ bein. ⁶ Âpme ningat nambalam tep butnaŋ menzok mann zinak bukeboŋ. Egaŋ sekŋ notnaŋ sambe mtot indemti bekananŋ omba penaŋ mamin. Egaŋ sekŋ sambe mama mimi bekananset maindamepme walepmâzin ma egaŋ

sekgalen mama mimi bekanaj keyanj tepnok bume zime mama mimin bekanaj penanj mambein. Zet bekanaj keboj zenzeyet nambalaman tep butnanaj teziŋ nandanengatnanj mapendoin.

⁷ Soŋgom sepemanj ikŋak ikŋak tuengatnanj ma katikŋanŋatnanj ma age ma nombe mee ke amnanj mme sewakŋanj besâti ŋep mamsewakŋanj mambeip. ⁸ Yanŋut nambalam kapi an kwiyanj ŋep msewakŋanj kumbempepeyelen. Ek tagogopin guluk gilik mti bekanaj mti mimiek mamin. Nombe menemae keyelen zet tunanj bekanaj am indime gakikiyelen keyet katanj.

⁹ Nambalamnanj Amobotnanj Bipm masesewatsanup ma nambalam ikŋanj keyanjak Kawawananj am ikŋanŋat sepem mimindeye ekŋen ke manzemtalatindenup. ¹⁰ Dembusek kwep keyanjak sesewat zet ma zemtalat zet matozin. Notnne, mneti nin mama mimi kekok mbanupmagengat. ¹¹ Tu zikatnanj kwep keyet tu penanj ma tu yoyonj temakwep ku makwalup. ¹² Notnne, simam zup tepmanen sanŋanej penanj ŋep wenak? Ma sam tepmanen simam penanj ŋep wenak? Ma nembu akŋananj tu niniyelen dolakŋanj benak?

Nânâ dolakŋanj Kawawanmagengatnanj makozin

¹³ Inŋat tunŋuwinanŋatnanj an ŋen nânânjanj dolakŋanj ek ŋen mamain ma yek? Mamain beme eŋanj mamaŋanj ekdamuŋ mme dolakŋanj penanj bewe ma mobotnanj ku mbe ma ŋoktik dolakŋanj mam keyet penaŋanj am notnanj ekŋen zikat indame eknâm mbep. ¹⁴ In keŋ kuku mti am

notnaŋgalen mama mimiyet eiyak mti nen nâyap nâyap mamip keyet nâme nânâ penaŋ nâmtatnup manâip. Kegok mamip beme ke nânâ penaŋ yek; dâsuki keyepm sek mobopiŋ. ¹⁵ Nânâ sepem keboŋ ke gwaengatnan kwatoge kekok ŋep penaŋ ku zenzeyelen yek. Nânâ keboŋ ke msalengatnaŋ, anmagengatnaŋ ma Sadaŋ ekmagengatnaŋ. ¹⁶ Keŋ kuku mti nâyap nâyap palen mnik beme keyet keŋaset mama mimi bekananŋ mamsokbein ma mama kileŋ mama masokbein.

¹⁷ An nâmâtâzin egaŋ mama mimi dolakŋaŋgalen nânâ ke Kawawaŋmagengatnaŋ toge keyelen mama mimiŋanen kapigok masokbein: Keŋ kwatetepmaŋmak mama ma keŋ sewak palen mama ma keŋ taoletmak mama ma mtoti mama ma aŋgalaŋ gogot palen mama ma mama mimi dolakŋaŋ mimi ma ken ke ken ke ku mimi ma kwalanŋ kwalanŋpiŋ mama. ¹⁸ Keŋ sewak palen mamayet maomkakalip ekŋenaŋ keŋ sewak keyet alikŋaŋ maondeip keyet penaŋaŋ teŋ mama ke mamsokbemindain.

4

Am msalen kwitnaŋ kwitnaŋ kakikiyet tikŋaŋ manâip ekŋen Kawawaŋaŋgat kasaŋane

¹ Inmagen kasa kasa mam maip ma âmanda manda masokbein ke yaŋaŋ kwilekiyet? Keŋŋinanen sekgalen kwitnaŋ kwitnaŋ titiyet tikŋaŋin indamandame tisât sebet dindiŋ mamip keyaŋ ke tati mme âmanda manda mamip. ² In keyet keŋin mawazinaŋgut keyet penaŋaŋ toŋaŋ kumambeip. Keyepm in dopmaŋ mekum kokum

mimiyelen maweyanbemtalip ma dopman kekelim dopman kekelim mtingut keyet penañ ku tiwien. In kasa kasa ma mdândândâ mulup mtingut penañ time kwaopme ku manimwianip sepem keboñ. Ke dundundupin belak kilen mamaip keyet penañ kekok mamip. ³ Naman ñen mandundup wanğut penañ ku matip. Ke keñnanen bekanañ kapigok tapme keyepmti mandundum aleip. In kwitnañ kwitnañ tisât mandundup ke ilinañgat tikñañinañgat mâti etañ mandundup keyepmti penañ ku matip.

⁴ In Kawawañ bamkumpemti tususun maelengeip, msalen kwitnañ kwitnañ bekanañ mti mambe am keyañ Kawawañ mabamkumpein. In ke nâip? Keyepmti an ñen msalengalen kwitnañ kwitnañ kapiyet notn notn mpewe beme Kawawañgat kasañ bewe. ⁵ Kawawañgalen zet muluwañ kukuñañ tazinen ke esemteñ ku mâti zeye, egañ zet ke galak zeme zeye, keñnanen Emetak Teñ beye keyañ egat zapat etañ penañ mamayet windenañ penañ mamin. ⁶ Mti nembetnañ keñ taolet omba penañ maminndain. Keyet Kawawañgalen Zet Itanañanen muluwañ pigok penañ mimiñañ tazin, “Kawawañ egañ am mobotnañ mamip ekñen bandimin mamâtâtindein. Ma am mtoti mamaip ekñengatgut keñ taolet mamindain.”

⁷ Keyepmti in Kawawañgat kandañan meti mambep mme Sadañ indetetim indiksât kopme kan keyet ek ekti ku kuñzunbep. Katikñañ be-mtapme ke ekti kiñgatindemti kunzunbe. ⁸ In Kawawañmagen sokñanik mepme egañ kekokak

inmagen sokŋanik kobe. Am yomton, in bekanan mti keŋin time kileŋ mamekozin in keŋin peme Kawawaŋan weyaŋ zulut kaput mme mama mimiŋin kwetetepmaŋ bewe. ⁹ In mama mimiŋin mgasik keyet otnâmti si kemberŋ mbep. Oloŋen zeyen palen mamayet beme kemberŋ palen tabep. Ma oloŋen palen mamaip beme si kundundu temaŋ mbep. ¹⁰ Amobotnangŋat kandenan mtoti mame egaŋ mwatonzemindewe.

Nolin zet bekanan ku diindowep

¹¹ Notnne, in zet bekanan ku zewep. An ŋenan notnangŋat zekukuŋan mti zelen pewe beme ek zii zet mtopewe. Enenogat Kawawaŋalen zii zelan notn notn mmamayet zenzenan ke egaŋ anŋosoye kekok bein. Geŋ zii zet anŋosowanik beme geŋ zii zet gawepupu an ku bewanik. Geŋ an zemdelan zenze an benik ke yomaŋmak. ¹² Kawawaŋ iknan etaŋ zii zet ndaye keyet tonan ma Egaŋ etaŋ ningalen an zemdelan zenze an bein. Ndatim tatagalen winde ma ndaketim ndendeyelen winde e ekmagen etaŋ tasain. Geŋ kwindan nodanŋalen zet zemdelan zenzeyet mulup ke gaye?

Sek ku mobogalen golan zet

¹³ Inmagengatnan an notnan ekŋenan kapigok manzeip, “Alak ma seŋenen kapi met msat ke nup kan kwep mamti mânep mulup mti mânep milawat temaŋ timti gilik zemti kobanup.” ¹⁴ In seŋenen ma âgânen kwileki ŋen zigok sokbemindawe ke in nâip? Geŋ gitangŋat mamandi msalen mambanik kapi teepmaŋ ke ku nânikgapmti buzak tat. Am ningat maman kasek

keboŋ belatnik ekmann moti madiŋpein keboŋ.
¹⁵ Keyepmti in kapigok zeme ŋep penaŋ bewe,
 “Amobotnaŋaŋ nâmdeme ŋep beme nin ewe alik
 mamti mulup ke ma ke ŋep mbanup.” ¹⁶ Yanŋut
 in zet mobotnaŋ zet iŋŋak ŋen penaŋ zemti sekŋin
 mammolip. Sek mmobot zet ke mŋasik penaŋ.
¹⁷ Keyepm an ŋen ek kwitnaŋ kwitnaŋ dolakŋaŋ
 ke mimiyeleŋ setnaŋ nâmtati mimiyeŋ wisat mbe
 beme ek yommak bewe.

5

Am mânep milawalin temaŋ ekŋengat golan zelin

¹ Am mânep milawalin temaŋ in sek sindem
 sokbemindawe keyet eweŋan pigogat kemberŋ
 palen mamti si kundundu omba penaŋ ma-
 mambeŋ. ² Mânep milawalin ke etimbemti yek
 bemâbe ma saŋgum kâlâp elimiakŋin sopmaŋ ke
 msatgat zapat bemâbe. ³ Ma mânep ma gol sil-
 waŋin saŋgip saŋgip kwabe. Âpme saŋgip saŋgip
 keyaŋ ilinaŋgat yaŋaŋin msokbemindemti tep ke-
 boŋ bemti indazimâbe. In kan delaŋ zenzeyelen
 bududuk tabeme keyaŋgut in mânep milawat-
 gat mulupmaŋ mti time maŋge temaŋ moge.
⁴ Nâip, mulup an ekŋenaŋ muluwengatnaŋ meu
 penaŋaŋ akumindame in keyet tosaŋaŋ indamti
 butnaŋ ilin eleŋgemtiwieŋ keyaŋ ingat kwizet
 temaŋ penaŋ takuip. Âpme geŋ tosaŋin ku in-
 danik beme ekŋengalen gawekum gaio keyaŋ ku-
 lulunŋengalen kasa kuku an ekŋengalen Amobot-
 naŋ egat wakŋaŋ topme manâin. ⁵ Msalen kapi
 in nukŋaŋ ŋen ku aikti omakumbembe mulup

igagen mamip. Kan in zemindondoyelen kanen nâme bududuk bein keyangut in keñinaŋgalen tikñaŋ mâti tapmaip ke sekem bo palaŋgume sememti gunabikñaŋ mambem tazin. Âpme bamgat maindonip keboŋ. ⁶ In am kwetetepmaŋ ekñen zelen zemindomti kasa mamimindeip. Ekñen am yommpin belak tuŋgupmane maindom walepme ekñenaŋ dowin mimipin, belak matalip.

Nin nukñaŋ sokbemndame keyet nâmann betetnaŋ beme windembeŋ tabanup

⁷ Notnne, in Amobotnaŋ kobe keyet damuŋ nâmisimti mambep. In kapigok maegip, an ñenaŋ mulup mti kwitnaŋ kwitnaŋ ondempeme mawaŋ toti mme kwakwatgat damuŋ matazin keyet kataŋ in damuŋ tabep. ⁸ Âpme Amobotnaŋ kokotnaŋgat kanaŋ kegogak sokñaŋ bein keyet in damuŋ nâmisim mamti keñin mkatikñaŋ bemti tabep. ⁹ Notnne, Amobotnaŋaŋ inmagen zemdelaŋ zenze mulup msâgât kosâpm keyepm in mamti wisat zet ku mbep. Zet zemdelaŋ zenze An ek ilak sokñaŋanik penañ kozin. Pe nâmti tapmip ma yek?

¹⁰ Notnne, golaŋ zenze an ekñenaŋ Amobotnaŋgat zet zapatnaŋ zemkawaŋbewien ekñenaŋ sek sindem wisatnepin timti titiyek mbien yaŋgut ekñenaŋ nâmisim tabien sepem kegogak in nâmisim mambep. ¹¹ Nâip, sindem keyet keñan tati windemak mambien ekñengat Kawawaŋaŋ nâme dolakñaŋ penañ bein. Zop egaŋ sek sindem palen tati nâmisim tage ke nâip. Mme bam Amobotnaŋaŋ kwitnaŋ kwitnaŋ

omba penaŋ saye ke nâip. Amobotnaŋ ek ningat kembenj mindemti aŋgalaŋ gogot penaŋ mamimndein.

Zemkatikbembe kileŋ ku mbep

¹² Notnne, zet penaŋ ŋen kapigok mimiyet zema nâit. In kululuŋgat kwitnaŋ kumti zelin kaliŋaŋ ku bandim mbep. Ma msatgat kwitnaŋ ma kwitnaŋ ŋeniyet palen kumti zelim ku bandim mbep. In penaŋ, “penaŋ” zeit; Yek, “yek” zeit. Zet penaŋ ku zeip keyet Amobotnaŋaŋ zelen indewe.

Am teŋ ekŋengalen dundunduŋin winderŋaŋmak

¹³ Inmagengatnaŋ an ŋenaŋ nukŋaŋ keŋan tabe egaŋ Kawawaŋgat dundum sawe. Ma ŋenaŋ oloŋen palen mambe egaŋ Kawawaŋgat kwizet buŋamaŋ mwati sesewat silik kuwe. ¹⁴ Inmagengatnaŋ ŋenaŋ zawat mbe egaŋ an ŋeŋaŋ bembe notnaŋ zeme kot ondektati egat mti dundundu mulup mbep. Mti Amobotnaŋaŋ mukulem mpepeyet dundum sawep ma âlip katnaŋgat kelakŋaŋ isikŋaŋ bugan keyaŋ kaput pewep.* ¹⁵ Âpme nâmkiŋpepemaŋ tati dundundu mulup mbep beme an zawatmak ke Amobotnaŋaŋ weyaŋpewe. Ma an ke bekaŋaŋ ŋen mge beme yomaŋ katikpewe. ¹⁶ Keyepmti in alik besât nâmti yomin zemsokbemti dundunduyen mukulem mukulem mbep. An teŋ mamain egalen dundunduŋaŋ penaŋaŋmak masokbein.

* **5:14:** Zuda am ekŋenaŋ âlip tegat misikme kelakŋaŋ topme keyaŋ melesenok manzulutindetemien.

¹⁷ Golan zenze an ñen itnanan manje kwitnan Ilaiza ek kegogak an nin kabonak. Âpme egañ msalen map ku totogat nâmti dundume msalen map tototpiñ nup kan tuk ma eyonga 6 kasup takwage. ¹⁸ Âpme bam ewe map totogat nâmti dundume kululunengatnan mawañ toti msat kume naman kwitnan kwitnan dolakñan kwapmâge.

An set kileñ mege beme mtati selenegak pewanup

¹⁹ Notnne, inmagengatnan an ñenan zet zapat katnan penan katikpemti mama mimi bekanan mge beme in gilik zemti wabep. ²⁰ Keyepmti in zet kapi weyañ nâit. An ñenan notnan a yomton gilik zemti wati kwabe beme egañ notnan ke gakikiyet zapat tatatnanen gilik zemwabe. Mama mimi kekok mme Kawawañan yomañ sambe manzulupme mepmâzin.

Kawawangalen Tâtâ Alakŋaŋ
The New Testament in the Nabak Language of Papua
New Guinea

Nupela Testamen long tokples Nabak long Niugini

copyright © 1988 Wycliffe Bible Translators, Inc.

Language: Nabak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 21 Feb 2024 from source files dated 31 Aug 2023

ea68a902-358a-5c72-82de-a583fc4809e7